



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Kobi melii Russia Tir Vladimir Putin-i
India semdangtsü: NSA Ajit Doval

Onoki Gaza magitsü, Hamas talenba
nungi salatsütsü: Netanyahu



VOL. XXII ISSUE NO. 296 (ADOK 296)

DIMAPUR

AMUNGNÜ SUNDAY

LUROI (LUROI) 10, 2025

₹ 5.00

Aotula T Imchen-i CP Dimapur mapa agizükogo

Dimapur, Luroi/August 09 (TYO): Aotula T Imchen, IPS-i Commissioner of Police, Dimapur indang mapa agizükogo.

Dimapur nung Police tekolakba mapa ya lai August 8, 2025 nü Commissioner of Police Headquarters office, Dimapur nung sentong tongmelang ka nung agizük.

Aotula T Imchen, IPS-i Kevithuto Sophie, IPS melener, shiba promotion nung IGP (Armed BN/IR) & IGP(VG), PHQ, Kohima mapa inyaksü ao.

Aotula T Imchen-i o tatsüka jembidang, "Dimapur,

Chümoukedima aser Niuland district tem indang Police Commissionerate nungi nübur tenzüksü ya maongka tulu lir," ta ashi.

"Ozüng shidak amshitsü, nüburtemi police dak tamang katetba tali akangshitsü aser asen yimti nung kin ajunga kumzüka ayutsü asoshi bendanga agütsür inyaksü temulungtetba nung lir. Kasa mapang ajaki amalitep akatsü ayongzüker," ta lai ashi.

Aotula T Imchen ya taoba mapang senior level nung DCP Dimapur, SP Mokochung, SP Wokha aser Commandant 7th NAP BN inyaka liasü.

BJP-i Har Ghar Tiranga & Tiranga Yatra campaign ayongzüksü

Dimapur, Luroi/August 09 (TYO): India nunger Independence Day nungtem nung BJP Nagaland ajanga August 11-15, 2025 anogotem Har Ghar Tiranga & Tiranga Yatra campaign tenzüka state tesem ajungalen sentong balala ayongzüksü.

Tanü party office nung osangbener den jembidang, Nagaland BJP Chief spokesperson, N Kakuto Chishi-i ashiba agi Har Ghar Teranga & Tiranga Yatra ya sentong ka masü saka India nunger nüchiso anguba temaitsü pei kidangi Tiranga bener arua asongtsü asoshi nüburtem ajungshiba movement ka kumogo.

Taoba mapang sentsü asem aliba nisan ya sorkar indang institutions kisüng nung songa liasü, saka tangbo iba linük nisan tejak tenteta amshitsü sorkari senok nem temeden agüja lir, kechiaser iba yagi linük nüchiba aser Tsüngremi asenok ajak nung nüchi agütsüba temaitsü sayur, ta pai ashi.

Asenoki nisan ya bener senzütettsü aser asen kidang akhum agüja songa yutettsü, ta pai ashi.

Party-i August 11 nü district

jails 11 nung alirtem asoshi medical camp ayongzüksü aser party ketdangpur temi Naharbari, Dimapur nung aliba Deaf Biblical Ministry semdangtsü.

August 13 nü national tricolour flag ya BJP head office, Kohima nung aser district 14 aser mandal offices 60 nung asongtsü aser iba sülen district 14 prongla nung Tiranga bike yarta alitsü. Anepdang mandals 60 prongla nung mürekmejuba sentong ka agitsü.

August 14 nü party-i district 14 aser mandals 60 nung linük sadangba (India aser Pakistan) bilemteta amungtsü aser ex-servicemen kibongtem semdangtsü.

August 15 nü Independence Day amungba sülen hand cart tiranga yatra ka DDSC Stadium nungi tenzüksü, Ram Janaki Higher Secondary School, Dimapur nung food drive ka alitsü aser district 14 nung state Mahila Morcha ajanga sanitary pads lema agütsütsü, ta ashi.

47 Aboi, 57 Thonoknyu aser 60 Pungro-Kiphire A/C mandals nung penalty shoot-out ka ayongzüksü, ta Chishi-isa metetdaksü.

BJP Nagaland tir & Dimapur Railway Union-i Union Railway Minister ajuru

Kohima, Luroi/August 09 (TYO): BJP Nagaland State tir Benjamin Yepthomi den taoba mapang MLA inyaka alirtem aser Dimapur Railway Union nungi teshimtet nisungtemi New Delhi nung Union Minister for Railway, Ashwini Vaishnaw ajurua Dimapur Railway Station yanglushitsü asoshi mapang talangka anendaka aliba indang

jembia liasü.

State nungi aortemi Union Minister dang Northeast asoshi Dimapur ya gateway tongtipang ka lir ta angatetdaksü aser passenger temi nungdakba perija aser region nung connectivity tajungba kumdaksütsü asoshi anendaka aliba project tekeraba nung tenzüka inyaksü ajungshia liasü.

Kin pongui I-Day densema sorkar sentong nung shilem magitsü



5 Tribes CoRRP telungjem senden ka Hotel URA, Kohima nung August 9, 2025 nü mener osangbener den jembidang tangokba noksa nung angur.

Kohima, Luroi/August 09 (TYO): Nagaland nung küm aika tejen reservation policy nung temulung masüba tali akumba mapang 5 Tribes Committee of Review of Reservation Policy (CoRRP) ajanga aruya aliba Independence Day benjongmung densema state sorkar sentong ajunga nung shilem magitsü ta Honibarnü sangdongogo.

5 Tribes Committee aser Angami, Ao, Lotha, Rengma aser Sema kin nungi apex tribal bodies tem Kohima nung Honibarnü ghonda asem senden amenba sülen iba telemtetba ya agi.

Senden amenba sülen osangbener den jembidang CoRRP convener Tesinlo Semy-i ashiba agi, reservation policy lepa reprangshitsü atema state sorkari commission ka tentetba atema pela agizüker, saka commission nung züngsemtem shimba yimya khenyongi magizüker.

"Commission tentetba atema onoki pela agizüker, saka commission züngsem shimba nung onok mepelar. Civil society organizations (CSOs) inoksemba ajanga iba commission meja-meja inyaksüba nung tetsükdaksü ajurutsü," ta Semy-i ashi.

Indang indanga iba policy reprangshitsü atema tang teinyakdaka süang mesüra mapa nungi anisüngzüker aliba bureaucrats tema süang, sorkar ketdangsür kisüng aliba commission ka tentettsü committee takhangba liasü, ta pai jangjatsü.

Committee-i kodanga review commission tentettsü khanga

mali saka Deputy Chief Minister Y. Patton-i anir state sorkar den June 3, 2025 nü senden amenba nungi adok, ta CoRRP member secretary G.K. Zhimomi-i ashi.

State sorkari commission tentettsü asoshi June 12 nü 'principle' nung mulunga agizük, saka commission züngsem indang August 6 nü sangdongba CoRRP-i khenyongi magizüker, kong CSOs densema lir.

"Iba commission ya independent asütsüla. Reservation policy asadangtsü atema telemtetba agitsüba tentet ka nung CSOs adenba ajanga inyakyim nung tetsükdaksü ajurutsü," ta Zhimomi-i ashi.

Sorkar mapa shilem 64 shi 'advanced' kin pongui bena lir aser 'backward' kin ter-i sorkar mapa shilem 34 dang bena lir ta tawa state minister kati ashiba langzüdang Zhimomi-i iba figures ya tapi agi bilemba ka dang lir ta ashi. CoRRP ket nung data shidak lir aser mapang tetemsü nung sayatsü, ta pai ashi.

State sorkari central sorkar indang policy tem den küm 48 tain policy medemdangba nung kongshia jembidang, "Ibai state indang lir. Centre nung ST aser SC reservation ya state level nung intra-ST reservations den khenyongi balala," ta Zhimomi-i ashi.

Backward quota nungi tajanzük anguba kin tem den jembishinütsüba indang asüngdang dang, iba amala shisadokden ya sorkari shimba commission mapa lir, ta CoRRP ajanga ashi.

"Sorkari tesem ajungalen nungi tangatetba bendentsüla aser

solution tajung ka bener arutsüla," ta Zhimomi-i ashi.

Commission nung ita trok agütsüba alema maotsüla aser mapang atsülangba Committee-i magizüksü ta pai ashi.

Ano Commission indang recommendations ya national census den sendakteptsü sorkari bilema lira, tang aliba reservation policy ya agiena atatsüla, ta CoRRP ajanga ashi.

"Shilem magitsüba ya kanga junga asadanger telemtetba agiba lir. Tang telemtetba agia aliba ya apex tribal bodies aser parnok indang frontal organizations asoshi lir, koba kin pongu sangeri reservation policy reprangshitsü akhangba nung noklem tasembuba alitsü.

CoRRP kübok kin pongu indang apex bodies ajaga state sorkar nem tawa joint memorandum ka agütsüba sülen Nagaland indang reservation policy reprangshitsü asoshi akhangba tali tesashiba akum.

1977 nungi amshia aruba policy ya state nung kin balala indang tanü loktiliba, rongsenketzüng aser shisaliok den mapeter, ta parnoki ashir.

Mezüngbo küm ter asoshi kin tenet nem non-technical aser non-gazetted posts nung menden shilem 25 wazükja liasü. Item kin ya education aser economic tsütsü ajemdaker 'backward' ta tenüng agütsü.

Liyonga arudang reservation ya shilem 37 kumsüogo, kong Eastern Nagaland Backward Tribes tenet asoshi shilem 25 aser state nung danga backward tribes pezü asoshi shilem 12.

Doctor temelen meyok tashi transfer order ji magizüker: AKM

Mokokchung, 09 Aug (TYO): Aug 1, 2025 nü koba Nagaland Directorate of Health & Family Welfare ajanga transfer order adokba nung M.O Dr. Rongsenneken, Junior Specialist (General Surgery) shibai Chest Disease & TB Hospital, Mokokchung rangben anepalua repranga liasü, pa melen shinga meyoki pa transfer yokba asoshi Ao Kaketshir Mungdang-i khuret bena lemsatop.

Yipden 50 aliba Mokokchung TB Hospital ya TB tashitak

raraba nung tongtibang mozüki ka lir, yangi Mokokchung district nüburtem dang masü saka kidanger district aika ayimjema repranger, ta AKM tatong tir, Onenpong aser tongti zülur, Satemmongba nadi yokba sangdong ka nung metetdaksü.

"Onoki sarkar bangdak inyakyimji akümtsübur, aji saka, temelen ka meshimi transfer yokba jagi shiranger anepaluba nung timtem tulu ajurutsü", ta AKM lenirtemi ashi. Anungji, "Dr Rongsenneken temelen ka

meshim tashi AKM-i pa indang transfer order ji magizüksü. Pa melenji Medical Officer dang ka aginür, aser transfer order-ji mapa makümdang tamasa temelen shima yoktsüla", ta AKM lenirtemisa metetdaksü.

TB agi shirangertem anepaluba nung timtem majurutsüba tang aliba doctor melen tangar ka maru tashi sota atadaksünür, ta kasa sangdong nung AKM-isa Department of Health & Family Welfare dang metetdaksüogo.

Wokha nung somomo benjong amungtsü atema senden amen



Wokha nung taruba Somomo benjong atema renemshiba senden amenba mapang tangokba noksa nung angur.

Dimapur, Luroi/August 9 (TYO): Taruba somomo benjong atema renemshiba senden ka Wokha Deputy Commissioner indang Conference Hall nung August 8 nü menogo. Iba senden ya Deputy Commissioner Vineet Kumar, IAS lenisüba nung mena liasü.

Senden nung Agriculture Department aser Allied Department balala nungi ketdangsürtem adenshia benjong dak sendakba nung maparen balala atema mapa alemba den item ya benoka inyaksü asoshi tasa balala asa liasü. Sensaksem ya sentong

yanglutsüba inyakyim, department balala sendaktepba inyaksüba dak rangloker agi aser iba sentong takok ngua agitsü atema pei tebilembatem benoka sensaksema liasü.

Somomo benjong ya tang mezüngbuba Wokha District nung amungtsü lir. Iba benjong ya One District One Product (ODOP) aser district indang Banana Vision Document kübok ayongzüka agitsü.

Benjong ajanga district nung somomo tsünüba sayutsü, koba local aluyimertem ajungkettsü, somomo tali adokdaksütsü aser rongsen tali aazükdaksütsü asoshi lir.

Deputy Commissioner Vineet Kumar-i, iba benjong ya takok ngua amungtsü asoshi department balala longjemer inyaksü aser lokti-i shilem agitsü koda tongtibang iba indang lemsatet. Paisa, iba benjong ya aluyimba terenlok, rural entrepreneurship aser district nung libaliro jenjang ajungkettsü atema kanga tongtibang asütsü, ta ashi.

Somomo benjong ajanga Wokha district nung alu ayimtsü atema lenmang sadema lapoka aliba sayutsü, economic empowerment atema lenmang tasen lapoktsü, shishilembad balala sendakteptsü aser sobaliba ajungkettsü imlar.

Kohima District Planning & Development Board senden menogo

Dimapur, Luroi/August 9 (TYO): August ita atema Kohima District Planning & Development Board (DPDB) senden August 8 nü MLA aser DPDB Kohima mendenbuba Kevipodi Sophie lenisüba nung DPDB Conference Hall nung menogo.

Senden nung DPDB Kohima Vice Chairman aser Deputy Commissioner B. Henok Buchem (NCS)-i züngsemtem pela agizükba den taoba senden minutes lepa reprangshi aser tawa sentong balala benoka inyakba mapang teyari agütsüba atema pelaba lemsatetpa liasü. Paisa, Dr. T. Ao Football Tournament achaayangtsü atema lemozüker aliba ketdangsürtem dang tang tashi nung parnok mapa tajung asoshi pelaba lemsatetpa liasü. Paisa, tawa shimba Superintendent of Police, Kohima, Krodi Rhetso (NPS) pelashishia agizüka liasü.

Deputy Commissioner of Excise (Zonal), Venezolu Dawhuo-i, Excise Department, Kohima indang PowerPoint presentation ka agütsü. Lai, department puti otsü

metetdaksü aser ashiba agi, iba department ya 1963 küm December 1 nü amenok aser Nagaland Liquor Total Prohibition (NLTP) Act, 1989 benokba sülen Excise & Prohibition Department agi melenas liasü.

Department ya taoba mapang revenue bendena aliba nungi meyiper tang NLTP Act, 1989, aser Narcotic Drugs and Psychotropic Substances (NDPS) Act, 1985 benoktsüba dak rangloker inyakdar.

Taoba financial year nung Kohima unit-i NLTP Act nung aibelenba atema ken o 1,040 benok, heroin seret 1.725 aser codeine cough syrup bottle 9,000 puogo. 2024 küm January ita nungi 2025 küm June ita tashi nung senchi sen 11,26,000 chia revenue ama agütsügo. 2024 küm Hornbill benjong mapang department-i alima penzürtem atema temporary liquor permits 53 food stall tem nem agüja liasü.

Maneni temesepba mozü achiba aser yi ajemba dak sendakba nung awareness sentong balala ayongzüka agiogo, kong Village Adoption

Committee kübok Kezocha nung sentong ka agiba densema lir. Temetetsü kaji 2024 küm September 29 nü heroin (161 soap boxes) seret 1.61 Khuzama Check Gate nung pua liasü, ta Dawhuo-isa metetdaksü.

Senden nungsa Local Area Development Programme (LADP) 2025-26 kübok onük benokbatem agizük aser mendenbubai department tem dang District Planning Officer den tongtepratepa inyaksü mepeshia metetdaksü.

Sechü-Zubza nungi administrative headquarters belener aotsüba indang jembiba mapang SDO (C)-i, July 14 nü ken o dak sendaka alirtem den senden ka menogo ta metetdaksü. Ken o maneni tejakdangi bener aotsü atema mendenbubai yimtsüng 14 aser Western Angami Public Organization nungi lenirtem densema committee ka tentetsü benoka liasü.

Senden nungsa taruba senden nung PowerPoint presentation ka agütsütsü atema Veterinary Department nem nongloksü.



Artang ward, Mokokchung nung alir lanur zünger sarkar mapa mengui alir asoshi pei sasa ayangteta tepok sünga lidaksütsü nükjidong nung Artang Ward MMC Councilor, Yongkongsangla R-i teyari agüja kenü "Vermi composting, pickling aser financial awareness camp" ka Artang Community Hall nung katsüdang tangokba noksa nung angur. Iba sentong nung District Horticulture Office, SBI Bazar Branch aser Swavalamban Connect Kendra Mokokchung nungi shisalen sayurtem arua tesayuba agütsü. Iba sentong nung nisung 60 tema arua tangazükba balala ngua denogo, ta osang ka ajanga metetdaksü. Mokokchung, 9th August, 2025

Assam Rifles-i Rifleman Rudra nem tetushi agütsü

Dimapur, Luroi/August 9 (TYO): Assam Rifles-i, Rifleman Rudra Bahadur Newar nem tetushi agütsü, shiba 1971 küm August 9 nü duty nung aliba mapang Akhelato, Nagaland nung telungpurtemi khaseta liasü.

Pai linük asoshi taküm bendanga agüja sür küm 54 ajungba anogo naro toktsüba sentong ka ayongzüka agi, kong Assam Rifles Personnel tem adenshia pa nem tetushi agüja

liasü. Asür tenüng nung minute ana ola madoki tetushi agütsüba den military tetushi agüja naro tokja liasü.

Rifleman Rudra Bahadur Newar, ta tasü aitiba aser linük asoshi pai pa taküm bendanga agütsüba atema teti bilemteter aser pa ya tasü aitiba aser patriotism temaitsü ka kümogo. Pai linük asoshi pa taküm bendanga agütsüba ajanga putusa putu sepaitem ajungmesoa arudar.

Chiechama nung 3buba Jhum Fair 2025 ayongzüka agi

Kohima, Luroi/August 9 (TYO): Kohima district kübok Chiechama yimtsüng nung Chiechamiapfü Mechü Krotho (CMK) ajanga 3rd Jhum Fair 2025 ayongzüka region nung aluyimba tsütsü rongsen, sobaliba yimya balala aser nüburtem telungjem benjonga liasü.

Sentong akhümdong ka ama jembidang, aluyimba ya Nagaland rongsenketzung tongtoret lir, aser state nung nütsüng yongsük shilem 70 dak temai alu ayimer, ta Special Officer to the Chief Minister, Neibalie Rio-i ashi.

Tekonglu aser tzülü ya chiyongtsü züsentsü atema kisüng tongtipang masü saka state sobaliba den kanga junga taktepa lir aser benjongbentsü timba aluyimba nung sendaka lir, ta pai ashi.

Central aser state schemes balala ajanga aluyimer yaritsü asoshi sorkari inyakba indang lemsatetpdang, PM-Kisan Scheme kübok Chiephobozou SDAO nung registered farmers 6,030 lir aser itemji Chiechama yimtsüng nungi 912 lir aser parnok noklem asem lemsar küm shia sen 6,000 angur, ta pai ashi.

Ibai block nung aluyimer asoshi teyari agütsüba sen 3.61 crore alitsü aser Chiechama nungi aluyimertem küm nung sen 54.72 lakh teyari angur, ta pai ashi.

Pai, MOVCD-NER (Mission Organic Value Chain Development for North East Region) programme indanga lemsatetpa liasü, koba 2024 küm Ciethu tekong lu nung rangloker tenzüka sentong ka lir, ta ashi.

Iba sentong kübok Chiechama nungi aluyimer 140 tenüng zülüoka Direct Benefit Transfer ajanga nisung shia sen 7,000 agütsür aser ajak agi sen

9.8 lakh alitsü aser taoba küm tzük metric tonnes 10 shi ruzüka New Delhi aser danga state tem dang ayokba ya tongtipang alizüng ka tongtetba lir, ta Neibalie Rio-i ashi.

Taküm sorkari natural farming nung rangloka National Mission on Natural Farming tenzüka, ta pai ashi.

Chiechama nung aluyimer 125-i cluster ka kümteta register süogo aser küm shia instalments ana nung nisung shia sen 4,000 angutsü, aser yimtsüingi iba sen aitiba ajak agi 5 lakh alitsü, ta ashi.

Rio-i State Rural Livelihood Mission (SRLM) ajanga teyari anguba indanga lemsatetpa aser iba mission kübok Chiechama nungi züngsem 294 aliba Self-Help Groups 29 lir aser teyari sen 31.08 lakh nguogo, ta ashi.

Pai nüburtem dang akhi mapang nungi amshiba metsü-jangnatsü aser t s ü n ü s e m p o n g t s ü t e m mesamadaksüi kumzüka ayutsü ayongzüka aser dangalen nungi metsü-jangnatsü bener arua mamshitsü ajungshia liasü.

Chizami Seed Bank nung akhi mapang nungi amshiba metsüjang 150 shi rizünga ayur, anungji tzü-mopung melenba, industrial agriculture aser alimaer lendong balala nungi kumzüka ayur aser yamaji Chiechama nunga amshitsüla, ta pai ashi.

Rio-isa, Chiechamiapfü Mechü Krotho dang school extracurricular activity tem nung sobaliba aluyimba sayutsü atema benoktsü asoshi Village Education Committee den longjemer inyaksü ajungshi.

"Iba ajanga tanurtem nem aluyimba dak sendakba nung tenügdakba shisatsütem agütsütsü aser asen inyakyimtem tejakdangi bener otetsü," ta pai ashi.

**HOMI BHABHA CENTRE FOR SCIENCE EDUCATION
TATA INSTITUTE OF FUNDAMENTAL RESEARCH**

**National Olympiad Programme 2025-2026
in Astronomy, Biology, Chemistry, Physics,
Junior Science**

Iba sentong nung shilem agitsü jangraba kaketshirtem ajak November 22 aser 23, 2025 nü Indian Association of Physics Teachers (IAPT)-i ayongzüka corresponding National Standard Examinations (NSEs) (for science subjects) nung shilem agitsüla.

NSE nung qualify asüba ya 2026 küm corresponding International Olympiads nung shilem agitsü atema mezüngbuba jenjang lir.

To enroll:

NSEs: <https://www.iapt.org.in> (Aug 21 - Sep 14, 2025)

For more details: <https://olympiads.hbce.tifr.res.in>

<https://www.iapt.org.in>

cbc48143/12/0006/2526



August 09, 2025 nü Srinagar nung Jammu & Kashmir nung Congress Tir, Tariq Hameed Karra leniba nung Congress party nung inyaktertemi Jammu & Kashmir nem state jenjang agüjang, ta takhangba agüja lumia longkak aitdang tangokba noksa nung angur.

Election Commission-i unrecognised party 334 agienogo

New Delhi, Luroi/August 09 (Agencies): Honibarnü Election Commission (EC)-i Registered unrecognised political parties (RUPPS) 334-i registration telatetbatem anema inyakba mesüra teinyaktsütem meinyakba ajanga registration agienadokogo.

RUPPs 2,854 aliba nungi 2,520 dang kümogo. Representation of the People Act, 1951 nung Section 29B aser Section 29C kübok aser Income Tax Act, 1961 den Election Symbols (Reservation and Allotment) Order, 1968 nung ajemdaker item party tem atema income-tax concessions

malitsü.

Register süa aliba yimtenren party temi registration telatetbatem kübok küm trok tashi election nung metoktepra registered parties list nungi agientsü akok.

Ano Representation of the People Act, 1951 nung Section 29A kübok registration agiba mapang nung party temi tenüng, address aser office ketdangpurtem metetdaksür, aser iba nungji temelenshi kar danga lira ibaji tekeraba nung EC nem metetdaksütsüla.

Taküm June ita nung Election Commission-i states/UTs nung chief electoral officers (CEOs) dang RUPPS

345 reprangshitsü metetdakja liasü.

Honibarnü Election Commission-i sangdong ka ajanga, "CEOs-i itemji repranga asadangogo aser RUPPs nem show-cause notice agüja telangzüba agütsütsü atema party shia nem maongka agüja liasü. Iba sülen CEOs report nung ajemdaker RUPP 345 nungi 334-ibo telatetbatem shidak mebenshiba jangjaogo. Tanüngba RUPP 11 ji maneni reprangshitsü atema CEOs nem agütsüogo," ta metetdaksü.

RUPPs 2,520 dak alia tang India nung national party 6 lir aser state party 67 lir.

PM Modi SCO Tianjin Summit nung adentsü



New Delhi, August 09 (Agencies): Ato kilonser Narendra Modi-i Japan semdangtsü, iba sülen China nung ayongzüka aliba SCO Tianjin Summit (August 31-September 1) nung adentsü.

Modi-i tesüsabuba China semdangbaji 2018 küm liasü.

Yaküm October ita nung Russia nung Modi aser China Tir, Xi Jinping na ajurutepa senden amen aser iba mapang nungji lenir anati linük ana tsüngda tesendaktep tajungba akümsü atema jembia liasü.

China-i ashiba agi, SCO puti otsü nung Tianjin summit ya senden tulutiba asütsü, kechiyong iba senden nung linük 20 nungi lenirtem aser International organisations 10 nungi lenirtem adentsü.

August 29 nü Ato kilonser Modi-i Japan semdangtsü iba sülen Shanghai Cooperation

Organisation (SCO) senden nung adentsü. SCO senden ya August 31 nungi tenzüka September 1 tashi amentsü.

2018 küm June ita nung China kübok Qingdao yimti nung ayongzüka SCO senden nung Modi dena liasü, iba sülenbo tang mezüng pai China semdangtsü.

Hokolbarnü China Foreign Ministry otongdar, Guo Jiakun-i, "SCO Tianjin Summit nung adentsü atema China-i Ato kilonser Modi jaoker. Telok ajak teyari ajanga Tianjin summit ya takok ngua agitetsü," ta metetdaksü.

"SCO züngsem linüktem densema linük 20 nungi lenirtem aser aser International organisations 10 nungi tekolakupurtem iba senden nung adentsü. SCO tenzüka sülen senden tulutibaji SCO Tianjin Summit astsü," ta pai

metetdaksü.

Iba senden nung Russia Tir, Vladimir Putin-a adentsü imlar.

2020 küm May ita nung anüdoklen Ladakh arrtsülen India aser China sepaitem tsüngda raraba sülen linük ana tsüngda tesendaktep mejungi aküm. Ajisüaka India aser China nati tezüngzüktep ka kübok yaküm October 21 nü Demchok aser Depsang friction points nungi sepaitem aienishia tensa tajungba kümogo.

Yaküm October ita nung Russia kübok Kazan nung Modi aser China Tir Xi Jinping na senden amenba mapang nung tenati arrtsülen mangatettep aliba dak sendakba nung Special Representative Dialogue akatsü bangjema liasü. Iba mapang nungjagi tenzüka linük anapronglai tesendaktep tajungba akümsü atema inyaksangshir.

Tesüiba ita ana tsüngda Defence Minister Rajnath Singh, External Affairs Minister S Jaishankar aser National Security Adviser Ajit Doval nungeria China semdangogo.

Tianjin summit mapang nung Modi aser Xi na jurila senden amentsüa akok.

SCO nung züngsem linüktemji India, China, Russia, Pakistan, Kazakhstan, Kyrgyzstan, Tajikistan, Uzbekistan, Iran aser Belarus lir.

Operation Sindoor mapang IAF-i Pakistan nunger jet 5 khazük: IAF

Bengaluru/New Delhi, Luroi/August 09 (Agencies): Honibarnü Indian Air Force (IAF) tongti, AP Singh-i, Operation Sindoor mapang nung India-i Pakistan nunger raraba tayimtsü pongu khazüka yokogo, ta metetdaksü.

Russia nungeri yangluba anti-aircraft missile, S-400 ajanga India-i Pakistan nunger raraba tayimtsü aika khazüka yok, ta pai metetdaksü.

Bengaluru nung 16buba Air Chief Marshal LM Katre lecture sentong nung jembidang Chief of Air Staff, Air Chief Marshal AP Singh-i, "Asenoki tajemba agia raraba tayimtsü pongu khazüka yokogo aser tayimtsü tuluka-ELINT aircraft mesüra AEW &C aircraft asütsüa akok, kilometer 300 pilar aliba khazüka yok. Iba ya meta talangtüba nungi khazüka yokba liasü," ta metetdaksü.

"Asenoki tongti airfield rongnung ka- Shahbaz Jacobabad airfield amak. Iba nungji F-16 hangar lir. Hangar ka ser tesadang shi sama aser yangjia tayimtsü karbo raksatsür alitsüa akok," ta paisa metetdaksü.

Operation Sindoor mapang

Muridke-LeT Headquarters mamakdang tangokba aser amakba sülen tangokba noksa sayua AP Singh-i, "Iba ya tongti lenirtem aliba tesem ka lir. Parnok senden amenba office building-a liasü. Hadir nung keta aliba ajanga onoki video tangokteta liasü," ta metetdaksü.

"Asen air defence systems ajanga junga inyakogo. Asenoki tawa alizükba S-400 system ajanga tongtibang shilem agiogo," ta pai metetdaksü.

Singh-i, "Iba maparen takok anguba tongti kuliji sorkari telemteba agiba ajanga lir. Onok nem tetuyuba agütsü aser tenokdangba kecha magütsü. Tenokdangba kecha magütsü. Asalentong yanglua amaktsü atema onok nem tashi ajak agüja liasü," ta metetdaksü.

"Iba rara ya high-technology rara ka liasü. Ghonda 80 nungi 90 tsüngda onoki sashia amak, aser ibaji ajanga rara manenra parnok kanga takoksa angutsü, ta parnoki (Pakistan) meteta liasü. Ibayongji parnoki asen DGMO den jembitsü asoshi mepishi. Ajioda asenokia ibaji agizüka liasü," ta Singh-i metetdaksü.



August 09, 2025 nü New Delhi nung Raksha Bandhan anogomong nung taoba mapang Minister of state, Sadhvi Niranjana Jyoti-i BJP lenir, Mukhtar Abbas Naqvi tekanük nung Rakhi mesütsüdang tangokba noksa nung angur.

Rahul-i sangdong nung sign asütsüla mesüra tatok meshitsüla: EC

New Delhi, August 08 (Agencies): Lok Sabha nung opposition lenir Rahul Gandhi-i Election Commission sashia aitsüba sülen Election Commission-i, Rahul Gandhi-i pai jembiba sangdong nung sign asütsüla mesüra linük dang tatok meshitsüla, ta ashi.

Election Commission-i, "Rahul Gandhi-i pai bushitetbaji amangra aser pai EC nem tai tongloktsüjbaji shidak, ta amangra pai Declaration ka nung sign asütsüla. Rahul Gandhi-i Declaration nung sign mesüra iba tetezü pai bushitetbaji pai mamanger aser tiyazü nung tai tongloktsüba lir. Yamaji süra pai linük dang tatok meshitsüla. Pa atema lenmang ana lir- pai Declaration nung sign asütsüla mesüra EC nem

tai tongloktsüba atema linük dang tatok meshitsüla," ta metetdaksü.

Iba dak sendakba nung Rahul Gandhi-i, "Ni yimtenren nisung ka lir, anungji ni nüburtem dang kechi shidir ibaji kü o lir. Ni nüburtem dang yimjak nung aji ashir aser ibaji azüngashiba lir," ta metetdaksü.

Congress lenirisa, EC-i CCTV aser webcasting footage anogo 45 tashi dang ayuba ajanga kuli raksatsür, ta aija liasü.

"Tang ya Aso 21buba lir, anungji nai hard drive nung data kwi yunüdir yutettsü koka lir. Küm 10 indang data tejen-a yutettsü, ajisüaka Election Commission-i anogo 45 tsüngda CCTV footage samatsüner," ta Gandhi-i metetdakja liasü.



TIR YIMYIM YIMOBILEM (EDITORIAL)

DIMAPUR SUNDAY, AUGUST (LUROI) 10, 2025

Tsüngremi moatsüba anogotem

Khristan taküm ka atema tashi angudak tesem kaji taoba mapangtem nung Tsüngremi moatsübatem bilemtetba ya asütsü. Aji oda, asen taküm nung Tsüngremi moatsüba anogotemji asen alimai aruba anogo nungi tenzüka taküm piyong asenok lendong timtem nungi kümzüka, asenok aneptsüba, asenoki meshiba ataloktsüba, asen nem takok agütsüba aser ajak dak alaka asenok menen Yisu temeim agi nembanga yutsür tekümtet agütsüba anogoji asütsü. Nü taküm nunga yangi shia aliba dang nungi teimba Tsüngremi na moatsüba aser kümzüka anogotem alitsü. Nai itemji bilemdangang. Ashiko, asenoki item anogotem ajakji amadoker, asenoki asenoksasa alir amai bilema alitsüa akok. Iba ama bilemba jagi, asenoki meteta aser memeteti sarasademtsüa mejangrai kümadoker alitsüa akok, mesüra sarasademiyonga, akhidang Tsüngrem dang asen nüngdak shia sarasademba amatobo sarasadem mesüteti alitsüa akok. Khristan taküm ka asoshi iba mapangbaji kanga lendong lir. Ibayongji, Mosa aser Yihusua nungertemi parnok alima nungi pilatsü mapang agi tonga arudang, par nübortem dang Egypt alar tia nungi temerem tzüim aser Yordan ayonga sadanger ajangba anogotem nung Tsüngremi parnok moatsüba aser takok agütsübatem mamai bilemtettsü aser itemji pei chirnurtem danga shijen ashitsüla ta kanga züngzünga ashiba asenoki Tazüngkunem aser Yihusua taputem nung angur. Aji oda, nisunger yimya nung nüngdakba mapang nung ngurbo amadoker, anungji alima mesama tashi mamatsü atema Tsüngremi Israel nunger tanishirtem dang Pai parnok nem sayatenya agi takok agütsü shia iba tesem nungji long kabosa azünga ayutsü ashiba asenoki angur. Joko, Israel nungertemi Egypt lima alar tia nungi temerem tzüim sadanger jentetba tesümgangtsü Yihova Tsüngrem taochi aser ain mapa indang tobo amati ta lia, tesüsa Yordan ayong tzü metsünga aliba dena sadanger Kanaan lima atong. Atangji, parnok asoshi alima tongpangbo manen saka tenangzüka limabo tongogo, anungji Tsüngrem tashi aser ain nung küm 40 jajaba anogotem mamatsü atema Tsüngremi Yihusa dang, par nübor rongnung nisung terana, kin shia nungi kaka shimtetang aser parnok Yordan ayong ajangdang, kong putirtemi ozüng süngden apur akangakanga nokdak, iba tesem nung jagi long ter ana agitetang ta ashiba ama, itemji agiteter pai Yordan ayong sadanger ali takong nung Israel nungertem ajangdak, kong ozüng süngden apur putirtem nokdak, iba tesem nungji long ter anaji azünga otsü Yihusua tapu 4 nung shia angur. Item long terana azüngbaji Yordan ayong aser temeketji topur ajungtsü atema masü mesüra oliorartem anisüngzüka mena kazütsü atema azüngbaa masü, saka kasa Lashiba tapu nungji itemji tarutsü chirnurtem dang Tsüngremi par tsüraburtem dang meimba aser aochiba sayatenya mapatem indang ashitsü atema nüngshi mapa asütsü ta shia angur. Asen taküm nunga Tsüngremi tamakoktsü agi takoktsü kuma anitetba anogotem lir, asenok makamait tia nung shisabolua alidang Tsüngremi meimlaba nungi mana aser shi agütsüba anogotema lir, asenok shisabolua teimla samar aliba mapang aneptsüba anogotema asenoki ajuruogo, mi lendong, tzü lendong aser gari lendong ama nungi asenoki meteta kümzüka anogotema lir, asenok achiajem aser jakaliro yimya tamajung agi asenok samar alitsüba tia nungi asenok anitetba anogo tobo, ashiko, asenoki amar asütsüa akok. Ajisüaka, Tsüngremibo kodanga mamar aser meimer. Tanübo khen asenoki tesüba anogotem nung Tsüngremi asenok kümzüka aser moatsüba mapatem to bilemtetdi. Atangji, Tsüngremi moatsüba aser kümzüka mapatem mamatsüa asenoki nüngshi longbo azünga makatsüa akok mesüra zülua malitsüa akok, saka itemji asen mulungjang nungbo mamai rezünga alitsüla aser item otsütemji asen chirnurtem nem senmang kuma melenoktsütsüla. Tanü iba yimobilem azüngdang, Tsüngremi nü dang ajungba anogo ka danga nai bilemtera, na kong lir yangji apudaker Tsüngrem nem tenüngsang agüjang.

OLEMSABANG

OSHI RAKSABA KULI

~ P.Renthy Jamir.

(Yashi adok nungi...)

Süpo:-Sü tepui tai sü temesüng ano osak nung marem mozü kecha nunga maso Aori, Süpo, Remto, Sünak sürem ta jembir.

Tamasüba:-Mezüngbuba tematiba, tai kodanga masüba tamsür masü taküm alirtem tamsür Tsüngrem dang tamsüba ajar.

Tangla:-Langzü, tai tangla tanuri O tanglar O jembinur shinür tain O jembidang O mashir tanuri O tanglar ladanger metetnür.

Tanüngtalu:-Tanüngzü, ya tai tanüngtalu tetezü pi memenüp anko majung saka chir, agir anüngba dangbo anüngalu ta ajar.

Tatazü:-Sayu machi, tai tiptema ajemajema mamen senzüba ni tanepbo kolen mashi atazür senzür tsüzür.

Tebangnem:-Nongtem ola tatok ta ashi, iba ratet ya tera tai tebangnem tetezü senpet meshia chir ochi kuli mesütet.

Tanang:-Tanabuba tsükchir dak nok sangshiba, tai tanabuba masü tasembuba, mezüngbuba noksü tanabuba kongtang tasembuba tanang ta ajar.

Tsüngnü:-Asür nela nem chiyungtsü agütsüba, ya tsüngnü ta masü tsüngzü ta ajar mesüjungi tetsüngzür ta jembir.

Yangyang:-Taküm sangnu tapu ka, tai takümsangnu tashikang dener asapranger ajak dang ya yangyang (common) ta ajar nüktangyangyang Tsüngremyangyang asayatsü ta-a ajar asatena aliba takütem.

Zülioli:-Tenendak mali temulung magutsü, tai iba tetezü tongtibang masü, tang nüngdak masü ajibo zülioliar yuja liang ta jembir.

Yamala tetezü tai ratetba aika rongnung kar tatishitsü atema zülur, kechiyong tarutsü lanurtemi tai angazüka jembitsü ASLB-i Arok Osep nung aibelena ratetba kar shiogo ano Ao Milen aser Tir Yimyim osang zülur den All India Radio Ao osang azüngertem Kohima Mokokchung tai züluba azünga kar aser osang azüngertem ya Ao oshi metetertemi azüngtsüla, karibo amang tajung salem ta-a azünger amang tajung ta mejembir osang azünger iba tashiji tama metetertem lir, anungji Ao oshi koda renloktsü taitem kar joko raksatoker alibatem bena arudi.

Mokdang:-Iba ojang ya mapang talangka Ao oshi metetertemi ashishitepa zülü, saka Ao osang kaket zülurtemi mokdang mokdang tasa züluba agi memelenshitet. Ao oshi nung mokdang ya ali agi tzü yima aliba nokdangba dang ajar. Aor sobaliba nung ojang ya ango aputsü asset atangba nung amshir. Ayong yima aliba tongti nokdangra tongti tsükdang ta ajar iba sülen tapok tila nungi tzü tera aluba dang tzüürü ta ajar. Iba tzüürü ali tila bener arua nokdangba dang mokdang tzüürü mokdang ali moka tzüürü nembangba. Tzülu ayimertemitzü tiala yimpoka aliba ali agi mokdang.

Ojang kaji tetezü shitak literal meaning asütsü tim Aori Bandh tang ya mendang ta ajar nisung kodanga mokloka mekazür ali telong kodanga mena mekazür. Tanü kaketshirtemi lenmang mendanger. Akhi mapanga Aori iba yimsü amshia aru tanü yimer ajak mungdangtsü. Kar tashi manga miima ao nunga tasür lanur kar among lendi nung ozüngji amer ata-a alir. Lanuri lendi mendanga lir. Aor tenung Kijamendang Noklenmendang, mendang ya Aor sobaliba oshi ojang taret ka lir aser aji sobaliba memeteteri raksar mokdang ta ajar.

Shisangren:-Iba ya identity ta ajaba masü. Ao oshi nung identity dang shitetren ta ajar. Aor ka Sema ka Lotha ka Aorsang kobala shisangang ta kodanga mejembir shitetang ta-ang jembir identification. Nai ni shisanger ma ta mejembir nai ni shiteter ma ta jembir. Shisang ta asuba yabo tamajungrennung teimba amshir. Pa ya asenok rongnung tera tali shisanger.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Punjab nung Khristan lenirtem telongjem sentong ka agi



August 07, 2026 nü Ludhiana yimti nung ayongzükba Punjab Christian Leaders Assembly (PCLA) senden nung adenertem tangokba noksa nung angur.

August 09, 2025: August 07, 2025 nü Punjab tesem balala nungi denominations 26 nungi pastor tem aser Khristan lenirtem 200 dak tali adenshia telongjem sentong ka kaogo.

Ludhiana yimti nung ayongzuka agiba senden nungji Khristan lenirtemi India nung yimjung, ochi temeden aser telongjem atema inyaksü, ta sangdong.

Punjab Christian Leaders Assembly (PCLA) nung denominations aika densema lir. Iba senden nung Ludhiana, Jalandhar, Kapurthala, Amritsar, Gurdaspur, Pathankot, Moga, Firozpur, Barnala, Ropar, Nawanshahr, Hoshiarpur aser Fatehgarh Sahib densema district 23 nungi Khristan lenirtemi shilem agia aden.

"India nung tamangba yimsü nung ajemdaker telemsa tulu adoka aliba aser tayongzükba jenti aliba mapang ka nung iba senden ayongzük," ta lenirtemi metetdaksü.

Osangbener den jembidang Evangelical Church of God nung chairman aser Punjab Christian Leaders Assembly (PCLA) convenor, Rev. Dr. Richard Howell-i, "Ozü nüburtemi tebilemtsü onük balala ajangshiba mapang nung onoki ola madoki dangbo malitsü," ta metetdaksü.

Iba senden nung adener Khristan lenirtemi, "Khrista sülen anidakertem ama onok mission ji jara yanglutsü atema masü saka apu alatsü atema lir. Iba senden ya nija Arogotem dak alia lir. Iba linük tanela atema onoki sarasademer," ta metetdaksü.

Khristan lenirtem jagisa linük nung yimsü balala amangertem tsüngda tesendaktep tajungba kümdaktsü atema inyaksü nangzük.

Parnokisa Hindu, Muslim aser Sikh densema yimsü balala amangertem den ken o jembitsü, akhümtsübutepsü aser longjemer inyaksü, kechiyong India tashiji nübur temeyoktep aika longjemba nung keta lir, ta metetdaksü.

Lenirtemisa India linük temzüng nung aliba ama yimsü temeden, ajak kasa züngshiba aser senso ajak taküm akhümket atema inyaksü, ta metetdaksü.

Punjab nung lanurtem aikati temesepba mozü achiba dak sendakba nung Khristan lenirtemi, iba ya tebilemtsü onük tuluka lir, anungji iba tebilemtsü atema Arogoi rongdak süa inyaksü nüngdak, ta parnoki bangjem.

Khristan lenirtemisa state nung temesepba mozü lartem atema rehabilitation program katsütsü, lanurtem atema outreach sentong balala ayongzuka katsütsü, sorkar agencies aser lokti tentet balala den longjemer inyaksü aser temesepba mozü achiba tera bushia teti atema taneptsü angutsü asoshi asalentong balala yanglur inyaksü lemtet.

Khristan lenirtemisa Arogotem dang Dalit nungertem, jenshia aliba kibongtem, nütsüng ajema alirtem aser sensakertem atema ola adoktsü ayongzük.

Tetsübu agi ola madokteti alirtem atema Khristan lenirtemi tasü itta ochi jembiba nangzük.

Parnoki tetsürtem nem tashi agütsütsü atema inyaksü bangjem. Yimtenren tangatetba nungi masü saka Laishiba tesayuba nung ajemdaker tetsürtem nem tashi agütsütsü atema parnoki telemtetba agi.

Tsüngrem yimli nung tetsür-tebur tebandang kecha mali, saka Khrista nung ka dang; Arogoi ibaji shisadangtsüla, ta parnoki sangdong.

Khristan lenirtemisa tetsürtem nem shisaliok agütsütsü, lenisüba menden nung tetsür-tebur ajak kasa züngshiba ajungkettsütsü, kinüngburtemi kinüngtsürtem dak azükba tebilemtsü atema inyaksü aser Arogotem nung tetsür-tebur bendanga züngshiba anentsü atema inyaksü telemtetba agiogo.

Anitet tapu 2 nung ajemdaker Church of North India, Chandigarh Diocese nung Bishop Darbara Singh-i Khristan lenirtem dang ochi temeden atema tasü itta inyakba mapang nung Tsüngrem leniba dak mulung alemtsüla, ta ashi.

Paisa, timtem-toushi mapangtem nung temelenshi adokdaktsütsü atema Tsüngremi lenirtem ajungkettsür, ta metetdaksü.

Khristan lenirtemi sangdong ka ajanga, "Asenok tamangertemi ola madoki malitsüla. Nüburtem nem teimla aser ochi temeden agütsüba den aria meimba sayuba tsütsü asenok ya tesangwa agütsürtem asütsüla. India linük temzüng nung aliba democratic tangatetbatem ajungkettsüba den külemi asenoki Khrista tesayubatem benshitsüla," ta metetdaksü.

Punjab Christian Leaders Assembly-i district shia nung Youth Recovery Support Groups tenteta temesepba mozü achirtem nem counselling agütsütsü aser rehabilitation services agütsütsü telemtetba agi.

Tetsürtem nem tashi agütsütsü, sen aatsü aser tanga lenmang balala sayutsü atema Women's Leadership & Vocational Training Cells tentettsü parnoki telemtetba agi.

Justice Desks ajanga legal teyari angati agütsütsü aser Dalit nungertem den makamaiter kibongtem nem pastoral teyari agütsütsü, tanga yimsü balala amangertem den tesendaktep tajungba akümtsü atema Quarterly Interfaith Friendship Meetings agitsü aser Arogo ajak nung küm shia "Faith & Constitution" amongtsü aser iba anogomong nungji yimsü temeden, ajak kasa züngshiba aser senso ka teinyaktsütem sayutsü.

Iba senden ya Evangelical Church of God nung chairman Rev. Dr. Richard Howell, New Life City nungi Bishop Randeep Matthews aser Light of The World Arogo nungi Bishop Brian Anderson nungeri ayongzuka liasü.

Sentong Coordinators ji Ashray Trust nungi Rev. Isaac Dutta aser Aashima Samuel na liasü.

ANOGO ABEN TSÜNGREM DEN

TEMOATSÜTEM ZÜNGDANGTETBA

Kibubai Abel aser Pa tenla agizük. Saka Kain aser pa tenla Pai magizük....
~ Lipok 4:4-5

Iba Lai O nung Adam aser Eva tena chir Kain aser Abel tena luyim balala nung inyaka Tsüngrem nem tenla agütsü. Kain aluyimer liasü aser Abel san metsüa liasü. Tenapronglai pei nem moatsüba nungi tenla agütsü. Kain tenla Tsüngremi magizük saka Abel tenlabo agizük. Lai O jagi ashir, Kain aser pa tenla tetezü Kain taküm yimya, pa mulungsentsü, pa tangatetba Tsüngremi magizüktettsüsa pai aliba agi pai tenlabaji magizük ta angateter. Saka tenu Abelbo pa taküm rangpen Tsüngrem tsüngdang shidak aliba agi pa tenlaji Tsüngremi mulungba ama pai agizük.

Tanü meimchirtemi lenmang balala nung nüngdaktem atema tenlateper, kechi tangatetba, koba mulungsentsü koba lenmang nungi anguba rongsen aseni tenlar iba indang shisadangtsü kanga tongtipang kechiaser aseni tenlar saka Tsüngremi agizüktetba ka mesüra tenlabaji amajok. Tsüngremi Kain dang ashi, "kechiba na ain adoker? kechiba ne tejak shimaker? nai junga inyaka lira na magizüktsü ama? Tsüngremi asen taküm yimya, asen mulungsentsü tama repranger, anungji Pai aseni tenlaba agizüka moatsütsüsa asen mapa merüka lidi.

Nütsüng teimba aliba linük 5 nungi 4 nungbo Khristantem reshikangshir

August 09, 2025: Alima nung communism meyokteptsü nütsüng teimba aliba linük pongu meranger aser ibaji CCP nungi linük pezü nungbo ajungkettsütsü atema lir.

Khristantem anema inyaker India nung state kar nungbo aser reshikangshir, ta Khristantem yimtsüng nungi International Christian Concern meindoker. European Center for (ICC)-i metetdaksü. Law and Justice-i ashiba agi, 2024 küm kija nung India nung Khristantem anema inyakba tatalokba 160 ben dak tali liasü.

Ano Muslim nunger nütsüng teimba aliba Indonesia linük nung Khristantem nem yimsü temeden magütsür. Iba linük nung Tenla ki aika shibangtsüogo aser Tenla ki tasen asütsü atema temelaba angutsü kanga tasak.

Ano Muslim nütsüng teimba aliba Pakistan linük nunga Tsüngrem mezüngmeshiba ozüng kübok Khristantem nem tiyazü nung tai tonglokja reshikangshir. Pakistan nung Khristantemi shisaliok aser mapa maongka mangur aser mapang shia Khristantem anema inyaker.

Alima nung Khristantem alitsü atema linük tamajungtiba 50 list nung China, India aser Pakistan linüktem ya Top 15 nung densema lir (Open Doors World Watch List 2025).

Taküm March ita nung USCIRF-i US State Department dang China, India aser Pakistan linüktem ya Countries of Particular Concern (CPC) nung züngoktsü benoka liasü.

Alima nung communism meyokteptsü nütsüng teimba aliba linük pongu meranger aser ibaji CCP nungi linük pezü nungbo ajungkettsütsü atema lir.

India nung state kar nungbo Khristantem yimtsüng nungi meindoker. European Center for Law and Justice-i ashiba agi, 2024 küm kija nung India nung Khristantem anema inyakba tatalokba 160 ben dak tali liasü.

Ano Muslim nunger nütsüng teimba aliba Indonesia linük nung Khristantem nem yimsü temeden magütsür. Iba linük nung Tenla ki aika shibangtsüogo aser Tenla ki tasen asütsü atema temelaba angutsü kanga tasak.

Ano Muslim nütsüng teimba aliba Pakistan linük nunga Tsüngrem mezüngmeshiba ozüng kübok Khristantem nem tiyazü nung tai tonglokja reshikangshir. Pakistan nung Khristantemi shisaliok aser mapa maongka mangur aser mapang shia Khristantem anema inyaker.

Alima nung Khristantem alitsü atema linük tamajungtiba 50 list nung China, India aser Pakistan linüktem ya Top 15 nung densema lir (Open Doors World Watch List 2025).

Taküm March ita nung USCIRF-i US State Department dang China, India aser Pakistan linüktem ya Countries of Particular Concern (CPC) nung züngoktsü benoka liasü.

Alima nung communism meyokteptsü nütsüng teimba aliba linük pongu meranger aser ibaji CCP nungi linük pezü nungbo ajungkettsütsü atema lir.

India nung state kar nungbo Khristantem yimtsüng nungi meindoker. European Center for Law and Justice-i ashiba agi, 2024 küm kija nung India nung Khristantem anema inyakba tatalokba 160 ben dak tali liasü.

Ano Muslim nunger nütsüng teimba aliba Indonesia linük nung Khristantem nem yimsü temeden magütsür. Iba linük nung Tenla ki aika shibangtsüogo aser Tenla ki tasen asütsü atema temelaba angutsü kanga tasak.

Ano Muslim nütsüng teimba aliba Pakistan linük nunga Tsüngrem mezüngmeshiba ozüng kübok Khristantem nem tiyazü nung tai tonglokja reshikangshir. Pakistan nung Khristantemi shisaliok aser mapa maongka mangur aser mapang shia Khristantem anema inyaker.

Alima nung Khristantem alitsü atema linük tamajungtiba 50 list nung China, India aser Pakistan linüktem ya Top 15 nung densema lir (Open Doors World Watch List 2025).

Taküm March ita nung USCIRF-i US State Department dang China, India aser Pakistan linüktem ya Countries of Particular Concern (CPC) nung züngoktsü benoka liasü.

Alima nung communism meyokteptsü nütsüng teimba aliba linük pongu meranger aser ibaji CCP nungi linük pezü nungbo ajungkettsütsü atema lir.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tesenen

(v) süki o, mashilen ka nungi ashiba o (sarcastic)

* Leniri nübertem dang jashiba agi tesenen o shir ao.

Tesentaktep

(adv) kati ka den awashi nung mepilai aliba (relationship)

* Asenoki tangar kintem den tesentaktep junga ayutsüla.

OLONG PAITEP # 7235

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										

TIPIEN

1. Saku	- (4)
6. Songjen	- (7)
7. Mali/Tazüng	- (4)
9. Tasen apok	- (6)
11. Songtem	- (3)
13. Ata liasü	- (5)
16. Tzünglu den külemi tsüker	- (3)
17. Aso tila	- (6)
20. Tashi maküm	- (4)
24. Tenüng kasa jatepba	- (7)
25. Ki yangluba oset	- (4)

LANGTSÜNGLEN

1. Taksep	- (3)
2. Langtem	- (5)
3. O tamendaktak	- (4)
4. Nütsü tebuba	- (3)
5. Anüngdang tesarwa	- (3)
6. Apitet	- (5)
7. Yagi jungdaksür	- (4)
8. Anogo semer ka	- (3)
10. --- tatsü	- (3)
12. Tebur kidong aser zünga	- (4)
14. Pela agizükba tapu ka	- (5)
15. Tenüng atet	- (3)
18. Mejanga onü	- (5)
19. Talak techira	- (4)
21. Maneni	- (3)
22. Nübo teyi	- (3)
23. Meshi	- (3)

OLONG PAITEP # 7234 TELANGZÜBA**TIPIEN :**

1. Azüng, 3. Kimen, 6. Ajok,
7. Nüngo, 9. Anen, 11. Nütsüng,
12. Azük, 13. Golab, 14. Yagi,
15. Moapu, 16. Anüng.

LANGTSÜNGLEN :

1. Atongla, 2. Nangzük, 4. Mojing,
5. Nok, 8. Osü, 9. Anüolen,
10. Nembang, 11. Nüngja, 14. Yim.

TEBUR BALLON D'OR NOMINEE TEM**NOMINEES**

Jude Bellingham
Ousmane Dembélé
Gianluigi Donnarumma
Desiré Doué
Denzel Dumfries
Serhou Guirassy
Viktor Gyökeres
Erling Haaland
Achraf Hakimi
Harry Kane
Khvicha Kvaratskhelia
Robert Lewandowski
Alexis Mac Allister
Lautaro Martinez
Kylian Mbappé

Scott McTominay
Nuno Mendes
Joao Neves
Michael Olise
Cole Palmer
Pedri
Raphinha
Declan Rice
Fabian Ruiz
Mohamed Salah
Virgil van Dijk
Vinicius Jr.
Vinha
Florian Wirtz
Lamine Yamal

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Guwahati police-i sen taila bener Manipur nunger ana apu

Guwahati, Luroi/August 9 (Agencies): Guwahati police-i Honibarnü fake Indian currency notes (FICN) bener lia nisung ana puogo.

Itangitertem nungi osang tejangja angazükba sülen Basistha Police Station nungi East Guwahati Police District (EGPD) team kati Beharbari nung Audi showroom anasa Hyundai i20 ka sota liasü.

Police temi apuba nisung ana ya Wasim Wangmayum (21) aser Samurailatpam Prasanta Sharma (25) ta jangjaogo. Tenaprongla ya Manipur nungi lir.

Gari telung nung sepaitemi sen 500 note taila 36 ngutet, koba ajak senteper sen 18,000

liasü. Police-isa, tena senzua aliba Hyundai i20 (DL4C AX 0800) gari den Poco Android phone ka aser iPhone 15 Pro ka puogo.

Ken o bushisüngdangba sülen sen taila ya melenteptsü atema Noida aser Delhi nungi Guwahati-i bener aruba nguteta liasü. X nung police post ka ajanga iba gari sota sen taila apuba indang osang jangjatsüogo.

Police source kati ashiba agi, sen ya gari telung nung miima bener liasü. Tena ket nungi apuba mobile phone ana ya, iba ken o nung sendaka alir tangartem jangjatsü atema call record aser message tem atema tang asadangdar.

Noida aser Delhi nung supplier tem aser local teyari agütsürtem densema supply chain ajunga kaktettsü atema team ka tentetogo.

Law enforcement sources-i, iba ozüng alema inyaksangshiba inyakyim ya raksatsütsü nüngdaker, ta ashiba den sen taila ya senotsü tilateri tsütatepba ajanga local rongsenketzüngi aiter aser iba ajanga meyiper ozüng alem inyaksangshiba maparen tuluba kümdaksür, ta ashi.

Ketdangsürtemi ashiba agi, ken o bushisüngdanga aoba mapang ano nisung timba aputsü imlar. Ken o dak sendakba nung formal FIR ka yakta benoktsü imlar.

Siang dam dak sendakba nung Congress-i Arunachal sorkar aitsü

Itanagar, Luroi/August 9 (Agencies): Siang tesem nung aliba nüburtem tejangraba anema Arunachal Pradesh sorkari Siang Upper Multipurpose Project (SUMP) benoktsü merangba atema Congress party-i sorkar aitsüogo.

Parnokisa mapa atema asadangba mapang central security force tem amshia yimdaklirtem amokmerenba atema sorkar aitsüogo.

Hokolbarnü osangbenertem den sensaksemba mapang Arunachal Pradesh Congress Committee (APCC) tir Bosiram Siram-i, sorkari SUMP survey atema mekazüker aliba tesemtemi central force tem yok, ta ashi. Paisa, item sepaitem yagi yimdaklirtem amokmerener aser iba ajanga

tetsübu tentetdaksüogo, ta shisem.

Pai, sorkar lenirtem dang iba tesem semdanga yimdaklirtem den indang indang sensak asemstsü mepeshia metetdaksüogo. Paisa, National Hydroelectric Power Corporation (NHPC) den longjemba atema state aitsüogo aser ashiba agi, "state ya NHPC otongdar ama inyaksangshir. Iba mapa ajanga nüburtem ali maka kümdaksütsü anungji parnok ola angatsüla."

SUMP anemba den bendenloksema Siram-isa, Arunachal Pradesh Freedom of Religion Act, 1978 agintsü takhangba agütsüogo. Pai, iba ozüng ajanga kin o kin tsüngda telem dang adokdaksür, ta ashi. "Iba ozüng ajanga kecha

majangzüker aser bendanger nemang tamangba yimsü dak ajemdaker asenok lemdangdaksür. Arunachal ya Manipur ama mekümdaksütsüla," ta pai ashi.

Kasa mapang nung AICC secretary in charge of Arunachal, Dr. A Chellakumar-i, Arunachal Pradesh Statehood Act yanglushitsü ayongzükogo. Pai, Article 371(H) leparepranghitsü nüngdakba lemsatepogo, koba ajanga teküzmükba kar kübok statehood agütsür. "Onoki Union Minister Kiren Rijiju aser BJP lenirtem dang Arunachal nema Nagaland aser Mizoram na nem agütsüba ama temzüng ozüng kübok teküzmükba agütsütsü asoshi inyaktsü mepeshir," ta pai ashi.

Arunachal: ULFA-I, NSCN telungpuri AR camp ka amak

Dibrugarh, Luroi/August 9

(Agencies): ULFA-I aser NSCN telungpurtem asütsü ta temulung melemi bilemtertem yagi iba AR camp dak injang 25 shi khaoktsü. Iba sülen Assam Rifles personnel temia meyiper light machine guns (LMGs) amshia telangzüba agütsü.

Osang agütsüba mapang tashi nung iba lendong nung nisung asüba mesüra yiruba indang osangbo kecha maliasü. Lendong atalokba sülen security force temi iba camp amakertem putettsü atema iba

khalokja liasü.

Telungpurtem asütsü ta temulung melemi bilemtertem yagi iba AR camp dak injang 25 shi khaoktsü. Iba sülen Assam Rifles personnel temia meyiper light machine guns (LMGs) amshia telangzüba agütsü.

Osang agütsüba mapang tashi nung iba lendong nung nisung asüba mesüra yiruba indang osangbo kecha maliasü. Lendong atalokba sülen security force temi iba camp amakertem putettsü atema iba

tesem temeket meita ao tenzükogo.

Source balala ajanga ashiba agi, Independence Day amungtsü anogo ishika dang anunga lia telungpurtemi iba tesem nung yimjung raksaja tensa mejungi kümdaksütsü nükjidong nung iba jenjang agi asütsü.

Independence Day atongtsü lia iba tesem kanga kümküma aliba mapang tang telungpurtemi iba camp ya makogo.

Taruba Hokulbar Alaska nung Putin ajurutsü: Trump

Washington, Luroi/August 09 (Agencies): Ukraine nung rara tembangtsü atema jembishinütsü asoshi taruba Hokulbarnü Alaska nung Russia Tir Vladimir Putin ajurutsü, ta US Tir Donald Trump-i shiogo.

Kremlin-i osang tejangja shia mali, koba Trump-i social media nung sangdong, saka linük anaprongi taruba hopta tashinung senden amentsü imlar ta shia liasü.

Küm asem tejakdang Russia-i par anüolen kidanger Ukraine amak tenzüker tang tashinung nisung meyrirjang aika takum samar aliba rara asoshi iba ama senden ya kanga tongtipang lir, ajisiüaka rara anentsü tejangja meshiteter, kechiaser yimjung asoshi Moscow aser Kyiv nati akhangba nung tetsüngta kanga lir.

Anogo aser mapang tejangja social media nung melemsadang White House nung osangbener den jembiba mapang Trump-i kechi agreement agidir litsü-lika kar melenteptsüsa akumtsü, ta shia lir, saka pai iba sentong tejangja melemsa. Nisung karibo Russia-i par litsü nung bendenloka aliba region pezü

alema oa amokbanga aliba tesemtem ya meyipa agütsütsü akok ta ashir.

Ukraine Tir Volodymyr Zelenskyy densema mener sensaksem kecha malidang Putin den mezüing ajuruteptsü ta Trump-i ashi. Russia leniri Zelenskyy den majurutepyonga Putin den ajuruteptsü taoba mapanga Trump-i mulunga liasü. Iba yongji World War II sülen continent nung rara tulutiba anendaktsütsü merangba nung Ukraine senzuka yutsütsü akok ta Europe nung tetsübo aitdaktsü.

Tamalen Putin aser Trump ya teti ajurutepa liasü. Ajisiüaka Moscow-i ozüing alema 2014 küm Ukraine indang Crimean Peninsula agia aser 2016 US election nung shilem agi ta tai tongloksüba sülen Russia aser West tsüngta tensa mejungi akum.

Putin-i tesüsa US semdangba ya 2015 nung New York nung UN General Assembly senden nung adendang liasü. Taoba US tir Joe Biden-i 2021 küm Geneva nung Putin ajuruba sülen Alaska senden ya US-Russia senen mezüingbuba alitsü.

Armenia aser Azerbaijan

tsüngta küm aika rara aruba tembangtsü nükjidong nung framework ka Hokulbarnü sangdongba sülen Trump-i Putin den mapang tatsüka tsüngta ajuruteptsü ta ashi. Iba sülen pai social media post nung "kanga yongya ataba senden" ya August 15 nü Alaska nung amentsü aser osang tejangja maneni sangdongtsü ta shia liasü.

"Tir Putin-i yimjung aginer ta ni amanger, aser Zelenskyy-ia yimjung aginer. Tir Zelenskyy-i aginüba ajak angutsü, aser iba atema asenoki langka inyaktsü," ta Trump-i osangbener dang ashi.

"Kecha temela mali. Saka asenoki kar agitsü. Asenoki kar melenteptsü. Anaprong ajungtsü mechi litsü-lika kar melenteptsü," ta US tiri ashi.

Ukraine yimtitem nung bomb pokloksüba anentsü ashiba Putin-i mangaba tejashi Trump-i hopta ana tejakdang Russia dang sanctions agütsütsü aser Russia totzü aliba linüktem dang tariffs tali meshitsü sangdong. Pai anogo züngzüksüba Hokulbarnü tembanger. Saka tang tashi Russia nem temerenshi/tenokdangba agütsüba sangdonga mali.

Azerbaijan aser Armenia yimjung tezüngzüktep yangluogo



Hokulbarnü White House, Washington DC, nung Azerbaijan Tir Ilham Aliyev aser Armenia Ato Kilonser Nikol Pashinyan na yimjung tezüngzüktep agir teka amtepa salem asüandang tangokba noksa nung angur.

Washington, Luroi/August 09 (Agencies): Hokulbarnü White House nung US Tir Donald Trump-i ayongzükba senden ka nung Azerbaijan aser Armenia lenirtemi küm aika rara aruba tembangtsü nükjidong nung agreement ka zülutepogo.

Azerbaijan Tir Ilham Aliyev aser Armenia Ato Kilonser Nikol Pashinyan teka amtepa salem asü, koba otsüsütsü mapang ka lir ta US tiri ashi.

Iba agreement ya ajanga linük ana tsüngta tongtipang lenmang kar tanaben lapoktsü aser region nung US-i shilem tali agitsü.

Azerbaijan aser Armenia ya Nagorno-Karabakh mechi 1980s aser 1990s nung rara liasü, koba Azerbaijan nung Armenia nung aliba tesem ka lir aser tesüba küm ishika tsüngta azüdokshi tali akum.

Armenia aser Azerbaijan nati teti asoshi rara ajunga

anentsü aser senzusempongba, business aser yimten tesendaktep lapoktsü nangzükogo, ta Trump-i Hokulbarnü ashi.

"Tanü Caucasus nung yimjung amenoker. Rara aser tashiyim amshia tesem balala amokbanga aser azüdokshi agi sünger küm aika amajok nung indokogo," ta Aliyev-i ashi.

Pashinyan-i iba yimjung tezüngzüktep yangluba ya linük ana tesendaktep nung tongtipang alizüing ka lir ta ashi. "Parnok küm 35 rara, aser tang parnok tembar kumogo aser mapang talangka tembar alitsü," ta Trump-i iba sentong nung ashi.

Iba tezüngzüktep nung shilem ka ama US teyari nung transit corridor tuluka yanglutsü aser iba dang Trump Route for International Peace and Prosperity ajatsü, ta White House-i ashi.

Iba lenmang yagi Azerbaijan aser par autonomous Nakhchivan exclave sendakteptsü, koba Armenian territory ajanga sadanga lir. Taoba mapang Aliyev-i Armenia dang par linük asoshi Nakhichevan nung railroad corridor ka agütsütsü khanga liasü.

Armenia-i iba lenmang nung kibur kumnü aser Azerbaijan leniri tesüiba mapang iba corridor ya tashiyim agi agitsü amokmerena liasü. Iba yongji taoba mapang yimjung asoshi jembishinüba anendaka liasü. Linük anaprong nungi lenirtemi iba senden tepiyong Trump aser par team tenüing sanga liasü. "Tir Trump-i ita trok nung sayatenya ka inyak," ta Aliyev-i ashi.

Trump-i energy aser technology shishilempaba ulushitsü asoshi linük anaprong den tezüngzüktep ka yangluogo ta ashi

MULUNG NEN O



Lt. Imkonglemba Jamir, IPS Retd.
01.10.1938 – 04.08.2025

Onoki teti meima aliba tsürabur asür **Imkonglemba Jamir**, IPS Retd. (Mopungchuket), pa shirang yipdeni aiba anogo nungi tasünü (04 . 08 . 2025) tashi nenok tamang sarasadem, shisatsü, rongsen, aser nübu agi onok shisabulua timtema alidang yaritep nungji nenok ajak dang kanga pelar. Ozüi nenok ajak den arua majurutepteter saka asen Tematiba Tsüngremi nenok ajak moajang ta sarasademtsür.

~ **Temeim Kinüngtsü, Chirnurtem, Semchirtem aser kinüngtertem.**

Onoki Gaza magitsü, Hamas talenba nungi salatsütsü: Netanyahu

Jerusalem, Luroi/August 09 (Agencies): Israel Ato Kilonser Benjamin Netanyahu-i Hokulbarnü ashiba agi, Israel nükjidong ya Gaza agitsüba masü saka Hamas talenba nungi salaja tesunep aliba civilian sorkar ka amenokba nung yaritsüba lir. Pai iba o ya German Chancellor Friedrich Merz den phone ajanga jembisang ashi, ta ato kilonser indang office ajanga X nung sangdong ka agütsüba nung shialir.

Gaza City amokbanga ketdang asütsü densema Israel indang security cabinet-i military sentong tasen agizükba sülen linük balalai Israel aitsüba mapang ka nung Netanyahu-i iba o ya ashi. Iba sentong sangdongba ajanga linük nung alir aser aliba tesem balala nungi aitsü tenzü.

"Onoki Gaza magitsü - onoki Hamas nungi Gaza chioktsü. Gaza ya demilitarize asütsü, aser tesunep civilian administration ka amenoktsü, koba Palestinian Authority-a masütsü, Hamas-a masütsü, aser danga kiralongrar teloka masütsü. Iba ya ajanga ozü nisung pua aliba chiokba nung yaritsü aser tarutsü nung Gaza ya Israel asoshi timtem malitsü," ta Netanyahu-i ashi.

Phone ajanga jembidang Germany-i Israel dang nok-nü ayokba anentsü telemteba agiba jashiba indang Netanyahu-i Merz dang ashi.

"Holocaust sülen Jewish nunger anema tesashitiba amakba Hamas den Israel-i raraba nung yaritsü melen, Germany-i Israel dang nok-nü ayokba soita Hamas kiralongrar nem ang sempet agütsür," ta pa indang office ajanga ashi.

Hamas madak takok angutsü sentong tasenba nung Israel sepaitemi Gaza City agitsüba densema lir. Netanyahu indang sorkari Gaza tarutsü asoshi tangatetba pongu lemsatapa lir, aser yangji demilitarisation aser civil authority balaka amenoktsüba densema lir.

FORM NO. 14
[See Regulation 33(2)]
By Regd. A/D, Dasti failing
which by Publication.

OFFICE OF THE RECOVERY OFFICER- I / II
DEBTS RECOVERY TRIBUNAL PATNA
2nd Floor, (A, B & F Wing) Karpuri
Thakur Sadan, Kendriya Karamchari
Parisar (GPOA), Ashiana Digha Road,
Patna-800025

DEMAND NOTICE

NOTICE UNDER SECTIONS 25 TO
28 OF THE RECOVERY OF DEBTS &
BANKRUPTCY ACT, 1993 AND RULE
2 OF SECOND SCHEDULE TO THE
INCOME TAX ACT, 1961.
RC/15/2025 11.07.2025

IDBI BANK LTD.

Versus

M/S. SINGH AND SINGH CARGO
To

(CD 1) M/s. Singh and Singh Cargo
Proprietor Sri Jai Prakash Singh, S/o.
Shipujan Singh, at Ground Floor, Ward
No. 13, DC Court Junction, Diphu Road,
Dimapur.

(CD 2) Sri Jai Prakash Singh, S/o.
Shipujan Singh Proprietor of M/s. Singh
and Singh Cargo, Permanent R/o
Village-Masarh PO-Masarh, Nawada
Ben Bhojpur, Pin Code-802301 Present
Address-Kasbe Ara, Flat at Ground Floor
in Hariji Ka Hata Holding No. 260 Plot No
2782, Ward No. 15(Old) 19 (new) Ara
Bhojpur-802301.

This is to notify that as per the Recovery
Certificate issued in pursuance of
orders passed by the Presiding Officer,
DEBTS RECOVERY TRIBUNAL PATNA
in **OA/564/2023** an amount of **Rs. 4548450.01 (Rupees Forty Five Lakhs Forty Eight Thousands Four Hundred Fifty and Paise One Only)** along with
pendentlite and future interest **@10%**
Compound Interest Monthly w.e.f.
01.12.2023 till realization and costs of
Rs. 48000 (Rupees Forty Eight Thousands Only) has become due
against you (Jointly and Severally/Fully/
Limited).

2. You are hereby directed to pay the
above sum within 15 days of the receipts
of the notice, failing which the recovery
shall be made in accordance with the
Recovery of Debts Due to Banks and
Financial Institutions Act, 1993 and Rules
there under.

3. You are hereby ordered to declare on
an affidavit the particulars of yours assets
on or before the next date of hearing.

4. You are hereby ordered to appear
before the undersigned on **29.08.2025 at 10.30 a.m.** for further proceedings.

5. In addition to the sum aforesaid, you
will also be liable to pay :

(a) Such interests as is payable for the
period commencing immediately after
this notice of the certificate/execution
proceedings.

(b) All costs, charges and expenses
incurred in respect of the service of this
notice and warrants and other processes
and all other proceedings taken for
recovering the amount due.

Given under my hand and the seal of the
Tribunal, on this date : **11.07.2025.**

Recovery Officer
DEBTS RECOVERY TRIBUNAL PATNA

Dr T Ao Trophy: Wokha, Niuland, Phek & Mon nungeri takok angu



Kohima, Luroi/August 9 (TYO): Dr. T Ao Trophy 2025 inter-district football championship nung league asaya tatemangbuba anogo Wokha, Niuland, Phek aser Mon nungeri pei tata asaya kokogo. Iba asayamung ya Indira Gandhi Stadium, Kohima nung tang tasaydak lir.

Honibarnü mezügbuba asaya nung Wokha-i goal 4-0 agi Kiphire kokogo. Asaya nung mezügbuba goal ya Tsentselong-i minute 24buba nung idaktsü aser paisa minute 57buba nung tanabuba goal idakja liasü. Iba sülrn minute ka dang lir Yisanbemo-i tasembuba goal idaktsü aser Zaremo-i minute 69buba nung goal pezügbuba idakja parnoki asaya akok.

Tanabuba asaya nung Niuland aser Tuensang na kanga toktepa asayar Niuland-

i defending champion ya goal 3-2 agi koka liasü. Asaya nung mezügbuba goal ya Kakhevi-i minute 15buba nung Niuland atema idaktsü aser iba sülen Toka-i minute 38buba nung tanabuba goal idakja asaya mezügbuba shilem tembang.

Mapang tatsüka anisüngzüker asaya tenzüksüba sülen Ayemngongba-i minute 44buba nung Tuensang atema mezügbuba goal idaktsü aser equalizer ka kanga nüngdaka aliba mapang Niuland nungi asayar Torito-i minute 51buba nung own goal ka idaktsü. Ajisüaka minute trok dang lir mapang apuloktsü asayaba mapang Hivika-i Niuland atema tasembuba goal idakja parnoki asaya akok.

Tasembuba asaya nung Phek-i goal 3-0 agi Mokochung kokogo. Asaya

nung Johny, Veluta aser Shovelo nungeri goal kaka idakja parnoki asaya akok.

League stage nung tatemangbuba asaya nung Mon-i goal 3-1 agi Shamator kokogo. Asaya nung mezügbuba goal ya Shamator-i Apong ajanga minute 15buba nung idaktsü, saka asaya mezügbuba shilem metembangdangsa Mon atema Arap-i goal ka idakja goal kasasa aküm.

Asaya tanabuba shilem nung Laiwang-i minute 47buba nung Mon atema tanabuba goal idaktsü aser iba sülen Arap-i minute 60buba nung tasembuba goal idakja parnoki takok nguogo.

August 11 nü quarter final asaya:

1. Mon vs Dimapur @1pm
2. Chümoukedima vs Niuland @4pm.

Nagaland Amateur Boxing Association ketdangpurtem shimogo



2025-2029 tenure atema Nagaland Amateur Boxing Association (NABA) election August 9 nü Nagaland Olympic Association (NOA) Office, Kohima nung takok ngua agiogo.

Dimapur, Luroi/August 9 (TYO): Nagaland Amateur Boxing Association (NABA)-i August 9 nü 2025-2029 tenure atema ketdangpur tasentem shimtsü asoshi election takok ngua agiogo. Election ya Nagaland Olympic Association (NOA) Office, Kohima nung 10:00 ako nungi tenzüka agia liasü.

Election ketdangsürtem rongnung Hemanta Kumar Kalita, Observer, Boxing Federation of India;

Azhato Nyekha, Observer, Youth Resources and Sports; Neiyalie Angami, Returning Officer & Treasurer NOA; Neivikuolie Khatsu, Presiding Officer & Asst.

Secretary General, NOA nunger densema liasü.

Ketdangpur tasentem atema election ya NABA temzüng ozüng aser Boxing Federation of India guideline dak ajemdaker agiogo. NABA nung züngoksema aliba district boxing association tem nungi lenirtemi iba election nung shilem agia liasü. Election ya kecha tebendang makai sasadem sadema aser ochishia agiogo. Election result ya Returning officer temi 3:00 ako nung sangdonga liasü.

Ketdangpur tasentem yamai alitsü:

1. President (1 Post) Alemwapang Ao
2. Vice Presidents (3 Posts)

- i. Lakatsu Chopey
- ii. Manphao Konyak
- iii. K Edward Ngullie
3. Honorary Secretary (1 Post) Khrieliervio Tsumvu
4. Honorary Joint Secretaries (3 Posts)

- ii. Keduolhouliekro
- ii. V. Chingmei Phom
- iii. Ejanthung Ngullie
5. Treasurer (1 Post) ImtisunepAo
6. Executive Members (4 Posts)

- ii. Vibeilietuo Kets
 - ii. Khriwtuolie Usou
 - iii. Pungbachung Meru
 - iv. Rikhum Yimchunger
- Kasa mapang nung Nagaland Olympic Association-i ketdangpur tasentem nem tenüngsang agütsüogo.

Manchester United-i Benjamin Sesko alizükba sangdongogo

Luroi/August 9, 2025 (Agencies): Manchester United-i Slovenia nunger international asayar Benjamin Sesko den Honibarnü tenanzüktepa yangluogo. Pa ya United-i tang transfer window nung alizükba forward tasembuba lir.

Arishi küm 22 tain asayar ya RB Leipzig nungi pound million 74 agi alizükogo.

"Benjamin Sesko club nung adenba Manchester United-i pelashishia sangdonger. Pa züngoksemtü dang anunga lir," ta club-i ashi.

Küm pongu atema tenanzüktepa yangluba nung pound million 66.3 agütsütsü aser tanungba ya add-ons ama agütsütsü, ta osang ajanga metetdaktsü.

Sesko, shibai international asaya 41 nung goal 16 idaktsür lir, pa ya Matheus Cunha pound million 62.5 aser Bryan Mbeumo pound million 65 den add-ons million 6 agi alizükba sülen tang club nung denogo.

"Manchester United puti otsü kanga tajung saka ni tarutsü agi tali jangradaktsür," ta Sesko-i ashi.

"Onoki project indang

sensaksemogo aser team maneni renloka aotsü aser yakta tongtibang takok maroktem akoktsü atema ajak renema lir," ta pai ashi.

Sesko ya Newcastle dena sendaktepa liasü, saka Eddie Howe-i aniba League Cup akokba team yagi pa malizükter.

2024-2025 season junga masayatetba sülen club jenjang yanglushitsü merangba mapang club nung tejangraba tulu aliba indang Sesko-i lemsatep.

"Ni temaba jenjang tonga asayateta kü nükjidong ataloktsü atema iba club ya kanga tetemsü lir.

"Ni Ruben (Amorim) nungi angazüktsü aser takok angutsü atema teammate tem den sendaktepa inyaktsü matateter," ta pai ashi.

Taoba season striker Rasmus Hojlund aser Joshua Zirkzee na senteper goal 18 dang idaktsü. Taoba season United pur asaya 18 tashi nung tamakok angu koba Premier League era nung parnok asoshi tamakok paikaji anguba mezügbuba liasü aser parnoki point-a ajak senteper 42 dang nguteta liasü.

U.S. Open nung Paula Badosa masayatsü

Luroi/August 9, 2025 (Agencies): Taoba mapang World No. 2 asayar Paula Badosa, teberem yirur aliba ajanga taruba U.S. Open nung masayatsü telemtetba agiogo. Iba telemtetba agiba ajanga New York nung iba Grand Slam nung la taoba küm dang nungi tajungba asayatsü timla aliba tembangdaktsüogo.

Spain tsürla ya tang world rankings nung 12buba nung lir aser la June 30 nü Wimbledon mezügbuba round nung Britain tsür Katie Boulter-i tsükdaktsüba sülen tang tashi khen danga asaya mali. U.S. Tennis Association-i, main draw nung Badosa melena Switzerland tsür Jil Teichmann shimba Hokolbarnü metetdaktsüogo. Asayamung metenzük tsüngda ano asayar kar danga masayatetsüsa kümra France tsür Alizé Cornet main draw nung indang indanga asayatsü atema maongka angutsü.

Social media nung sangdong ka ajanga arishi küm 27 tain asayar yagi la iba asayamung nung masayatetsüsa akümiba indang osang lemsatepa liasü.

"Temulung retreta ni taküm U.S. Open nung masayatsü

telemtetba agiba sangdonger," ta Badosa-i ashi. "Iba telemtetba agitsü kanga tasak liasü. Taoba küm New York nung kanga junga asayaba den yimti aser fan tem den kanga junga sendaktepa sülen taküm iba asayamung nung masayatetsüsa akümiba ya kü atema kanga tejashitsüka lir," ta laisa shisem.

2024 küm Badosa-i quarterfinal tonga asayaba ya la asoshi U.S. Open nung tajungtiba asayaba liasü, aser iba sülen la ya WTA Tour nung tetsübuttsü aketba asayar rongnung ka aküm. Taküm küm tetenzüklen lai Australian Open nung semifinal tonga asayaogo, koba lai Grand Slam asayamung ka nung tajungtiba asayaba liasü.

La 2022 küm World No. 2 atongba sülen la ya tetsür asayartem rongnung tajungtiba ka akümstsü ta bilema liasü. Ajisüaka taoba season ana yiruba ajanga la junga masayatetba den asayamung tongtibangtem aika nunga shilem magiteti arudar.

Taküm US Open ya August 24 nü tenzüksü aser tetsür kija final asaya ya September 6 nü asayatsü.

BILEMDANGANG

"Lenmang aibelenogo ta metetra memenodang meyipang, mesüra kanga touashitsü."